

de découvrir à la dérobbée [164] si elle ne verroit pas l'ennemy; elle fut bien étonnée quand approchant de nostre demeure, elle veit ses gens cabanez en affeurance, elle les aborde, & leur conte son defastre; & eux luy declarent comme les cris qu'elle auoit entendu estoient des gens de sa Nation, & non des Hiroquois; & que le canon qu'elle auoit oüy se tiroit pour honorer la venuë de Monsieur nostre Gouverneur aux trois Riuieres. Cét erreur eut esté capable de faire mourir vn homme bien robuste, & ceste femme n'en receut autre mal, que celuy qu'elle endura dans sa triste folitude. Il faut que ie touche icy en passant vn trait de simplicité de quelque Sauuage: Comme on leur faisoit voir dans la Chapelle vn tableau où Nostre Seigneur est representé au milieu des Docteurs de la Loy; ils consideroient sa ieunesse, & la vieilleffe de ces Docteurs; & comme ils estoient tous peints avec vn liure en main, & nostre Seigneur aussi; ils prindrent garde que les Docteurs regardoient tous dâs leurs liures, & les tenoient ouuerts, & que Nostre Seigneur ne regardoit point dans le sien; cela leur fit dire ces paroles: Le Pere a raison de dire que ce ieune enfât fçauoit tout; tenez, prenez garde, faisoient-ils, comme il ne iette [165] point les yeux sur son liure, & ces vieillards regardent les leur fort attentiuement. La naïfueté de ces bonnes gens est par fois agreable. Il est temps de finir. La flotte nous laisse dans la tristesse, & dans la ioye; L'Hospital est chargé de tant de malades, qu'on est contraint d'en loger dehors sous des cabanes d'écorces. Les Sauuages sont grandement affligez, on dit qu'ils meurent en tel nombre és pays plus hauts, que les chiens mangent les corps morts qu'on ne peut enterrer. Les Religieuses